



Inatsisartunut ilaasortaq
Jens NapātôK'
Naleraq

§ 37 naapertorlugu apeqqummut nr. 2026/141-mut akissuteqaat

17-08-2026
Suliap normua 2026 - 14003

Inatsisartut suleriaasianni § 37, imm. 1 naapertorlugu apeqquteqarsimavutit taakkulu Inuussutissarsiornermut Aatsitassanullu Naalakkersuisoqarfimmit akineqartussanngorlugit innersuunneqarlutik. Akissuteqaatit Nalik Venturesimit taperlugit suliarineqarput.

Postboks 930
3900 Nuuk
Oq. (+299) 34 68 00
Fax (+299) 43 02
Mail: asn@nanoq.gl
www.naalakkersuisut.gl

Apeqqutigineqartut tullinnguuttuni ataasiakkaarlutit uteqqinneqarput, akissutitai tullinnguullugit allanneqartarlutik.

1. Naalakkersuisut paasissutissiissutigisinnaavaat, piginneqatigiilluni suliffeqarfinnik killilimmik akisussaaffilinnik (ApS) pilersitsinermi aningaasaatit minnerpaamik piumasaqaataasut 40.000 kr.-iniit 20.000 kr.-inut Danmarkimi atuuttunut naapertuuttunngorlugit appartinneqarpata pisortanut aningaasatigut allaffissornikkullu qanoq kinguneqarnissaat naatsorsuutigineqarnersoq?

Naalakkersuisut ilisimatitsissutigisinnaavaat, piginneqataassuseqarluni aktiaateqarluniluunniit ingerlatseqatigiiffimmut aningaasaateqarnissamut piumasaqaatip aningaasartaasa 40.000 kr.-mit 20.000 kr.-mut ikilisinneqarnerini aningaasaqarnikkut allaffissornikkulluunniit pisortanut kingunissat misissoqqissaarneqarsimanngitsut imaluunniit naatsorsorneqarsimanngitsut.

Danskit inatsisaannik allannguinnissamut sulinerup piareersarneqarnera pillugu allaaserisami atuarneqarsinnaavoq, allannguut aningaasaqarnikkut allaffissornikkulluunniit malunnaatilimmik pisortanut sunniuteqarunnaangitsaq naatsorsuutigineqartoq. Inatsisip allanngortinnerani aallarnisaasut ingerlatseqatigiiffinnik pilersitsinerminni inatsisit naapertorlugit aningaasanut pituttorsimanerisa qasunneqarnerini ajornannginnerusumik atugassaqaartitsineq pingaarnertut anguniagaavoq.

Kinguneqaatissat taakkununga assingusut Kalaallit Nunaanni imaaliallaannaq atuutsinneqarnissaannik nalilersuinissamut Naalakkersuisut tunngavissaqanngillat. Taamaattorli allannguut aningaasaqarnikkut allaffissornikkulluunniit malunnaatilinnik kinguneqassanganneqanngilaq.

2. Naalakkersuisut paasissutissiissutigisinnaavaat, taamatut appartitsineq namminersortut inuussutissarsiortut, pingaartumik aallarnisaasut kiisalu suliffeqarfiit mikisut akunnattumillu angissusillit eqqarsaatigalugit aningaasatigut allaffissornikkullu qanoq kinguneqarnissaa naatsorsuutigineqarnersoq?

Naalakkersuisut ilisimatitsissutigisinnaavaat, aningaasaateqarnissamik piumasaqaammi aningaasat piginneqatigiissuteqarluni aktiaateqarluniluunniit ingerlatseqatigiiffimmik pilersitsinissamut pisariaqartut ikilineqartussaasut.

Kinguneqaatissatut naatsorsuutigineqartut Naalakkersuisunit misissoqqissaarneqarnikuunngillat. Taamaattorli Naalakkersuisut naliliipput, ikinnerusunik aningaasaateqarnissamik piumasaqaat aallarnisaasunut suliffeqarfinnullu minnernut ajornannginnerusumik piginneqataassuseqarluni (ApS) aktiaateqarluniluunniit (A/S) ingerlatseqatigiiffimmik toqqaasinnaaneranmut ajornannginnerulersitsissasoq. Ingerlatseqatigiiffimmik pilersitsinermi aningaasaliissutit pisariaqartinneqartut ikinnerusut pigineqarnissaannik piumasaqartoqarnera naliliinermi tunngaviuvoq.

3. Naalakkersuisut paasissutissiissutigisinnaavaat, aningaasaatit minnerpaamik piumasaqaataasa appartinneqarnerat innuttaasunut, pingaartumik nammineq suliffeqarfinnik aallartitserusuttunut, aningaasatigut allaffissornikkullu qanoq kinguneqarnissaa naatsorsuutigineqarnersoq?

Naalakkersuisut ilisimatitsissutigisinnaavaat, aningaasaateqarnissamik piumasaqaammi aningaasaat pisariaqartinneqartut ikilisarneqarumaartut, taakkulu atorlugit innuttaasut piginneqataassuseqarluni aktiaateqarluniluunniit ingerlatseqatigiiffimmik pilersitsinerminni aningaasaliissutitut atorsinnaasavaat.

Inuit namminneq suliffeqarfiutiminnik pilersitserusuttut, aningaasanilli aallarniutissaminnik killilimmik periarfissallit, ingerlatseqatigiiffimmik ilusilersueriaatsip ajornannginnerusumik periarfississavai.

Taamatut allannguinerup kingunerisaanik innuttaasut qassit piginneqataassuseqarluni aktiaateqarluniluunniit ingerlatseqatigiiffimmik pilersitserusussanersut pillugit Naalakkersuisut naatsorsuusiornikuunngillat.

4. Naalakkersuisut paasissutissiissutigisinnaavaat, Danmarkimi imaluunniit nunani allani aningaasaatit minnerpaamik piumasaqaataasa appartinneqarnerisa suliffeqarfinnik nutaanik pilersitsinermut, aallarnisaanermut, suliffissanik pilersitsinermut aammalu aningaasaqarnikkut ingerlatsinermut sunniutaannik misissueqqissaarnerit, nalilersuinerit imaluunniit naatsorsuutit pigineqarnerlutik, aammalu pigineqarpata taakku saqqummiunneqarsinnaanersut?

Naalakkersuisut ilisimatitsissutigisinnaavaat, danskit ingerlatseqatigiiffiit pillugit inatsisaata allanngortinneqarnera piareersarlugu sulinermi nalilersuinerit saqqummiunneqarsimasut. Tassani atuarneqarsinnaavoq, aningaasaateqarnissamik piumasaqaatip qasukkarneratigut suliffeqarfiit ingerlatseqatigiiffittut ilusilerlutik pilersinneqarnissaat ajornannginnerulersitsissasoq. Pilersitsinermi aningaasaatit pituttugaasut ikilineratigut tamanna anguneqarpoq.

Danmarkimi aningaasaateqarnissamik piumasaqaat siusinnerusukkut qasunneqartarnerini misilittakkat aamma innersuussutigineqarput. Ataatsimut isigalugu ikinnerusunik aningaasaateqarnissamik piumasaqaatip pilersitsinermi ikinnerusunik aningaasartuuteqartoqarnissaa takutippaa. Peqatigaluguli qassinik aningaasaqarnissamik piumasaqaatip suliffeqarfiullu aallarterlaat qassiunerisa imminnut assigiimmik atassuteqarneri uppersaataannik saqqummiussisoqarsinnaanngilaq.

5. Naalakkersuisut paasissutissiissutigisinnaavaat, suna tunngavigalugu Kalaallit Nunaanni ApS-it pilersinneqarnissaannut aningaasaatit minnerpaamik piumasaqaataasut suli 40.000 kr.- iunerat sooq nunatsinni appartinneqarsimanginnerosq, Qallunaat nunaanni piumasaqaataasut 20.000 kr.-inut appartinneqarsimagaluartut?

Naalakkersuisut ilisimatitsissutigisinnaavaat, ingerlatseqatigiiffiit pillugit inatsit naalagaaffimmit oqartussaaffigineqartoq. Ingerlatseqatigiiffiit pillugit inatsit Kalaallit Nunaannut atuuttoq Kunngip peqqussutaa aqutigalugu atuuttussanngortinneqarnikuuvoq, peqqussutip allannguutai ilanngullugit.

Taamaammat Kalaallit Nunaanni piginneqataassuseqarluni aktiaateqarluniluunniit ingerlatseqatigiiffiit aningaasaateqarnissaannik piumasaqaatit allanngortinneqarnerini ingerlatseqatigiiffiit pillugit inatsisip atuuttup allanngortinneqaaqarnissaanik aamma Kalaallit Nunaannut atuuttulersinneqarnissaanik piumasaqaatitaqassapput. Taamaattumik

anigaasaateqarnissamik piumasaqaat imaalliallaannaq Naalakkersuisut allanngortissinnaanngilaat.

6. Naalakkersuisut naalagaaffiup oqartussaasuinik Kalaallit Nunaanni selskabslovgivningip allanngortinneqarnissaa pillugu oqaloqateqarsimanerlutik paasissutissiissutigisinnaavaat, aammalu oqaloqatigiinnerit taamaattut pisimappata, qanoq inerreqarsimansut?

Naalakkersuisut ilisimatitsissutigisinnaavaat, Inatsisip naalagaaffimmut tamarmut atuuttup allanngortinneqarnera pillugu naalagaaffimmi oqartussanik ingerlaavartumik oqaloqateqartarlutik, matumani ingerlatseqatigiiffiit pillugit inatsit Kalaallit Nunaannut atuuttoq ilanngullugu.

Kalaallit Nunaanni piginneqataassuseqarluni aktiaateqarluniluunniit ingerlatseqatigiiffiliorniarnermi anigaasaateqarnissamik piumasaqaatip allanngortinneqarsinnaanera pillugu apeqquteqartoqarnera pillugu isumaqatigiissutigineqarpoq Erhvervsstyrelsen atortussanik suliaqassasoq. Ingerlatseqatigiiffiit pillugit inatsisip allanngortinneqaratarsinnaanera pillugu Naalakkersuisut isummerfissaannut atortut taakku tunngavissiissapput. Allannguuteqaratarsinnaaneq qassinik anigaasaateqarnissamik piumasaqaatit eqqarsaatigalugit ikinnerusunik anigaasaateqarnermik imaqaratarsinnaavoq.

Naalakkersuisut atortut suliarineqarnissaat massakut utaqqimaarpaat, taamaattumillu inaarutaasumik isummersinnaanatik.

7. Naalakkersuisut qanoq nalilerpaat anigaasaatit minnerpaamik piumasaqaataasa appartinneqarnerat Kalaallit Nunaanni aallarnisaanermik, suliffeqarfinnik nunatsinneersunik pilersitsinermik aammalu namminersorlutik inuussutissarsiutinik ineriartortitsinermik siuarsaassasoq? Taamaappat naliliinermut tunngaviusut saqqummiunneqassasut qinnutigineqarput.

Naalakkersuisut naliliipput, ikinnerusunik anigaasaateqarnissamik piumasaqaatip pissutsinit allanit sunnerneqarsimanngikkuni piginneqataassuseqarluni aktiaateqarluniluunniit ingerlatseqatigiiffimmik pilersitsinissaq anigaasatigut aporfiit ikilisissinnaagai.

Tamanna tunngavigalugu ingerlatseqatigeeriaaseq aallarnisaasunut kajungernarnerulersinneqarsinnaavoq, aamma suliffeqarfiit arlallit ingerlatseqatigiiffittut anigaasaliiffiusinnaanerannik aaqquissuunneqarnerinut tapertaasinnaassalluni.

Peqatigalugu maluginiarneqarpoq, suliffeqarfinnik nutaanik pilersitsineq aningaasaateqarnissamik piumasaqaatip saniatigut pissutsinik arlalinnik aamma sunnerneqarsinnaasarnera, matumani aningaasalersuisinnaanermut periarfissat, niuernermini pissutsit, tuniniakkap piumaneqarnera kiisalu piginnaanerit ilanngullugit.

Naalakkersuisut maluginiarpaat, aningaasaateqarnissamik piumasaqaat akiitsoqarfimmik illersuiniarnermik ileqqoq malillugu tunngavilersorneqarsimasoq. Taamaattorli ingerlatseqatigiiffiup aningaasaataasa akiitsoqarfiup piumasaqaataanik tamakkiisumik akiliisinnaassuseqarsinnaaneri qulakkeersinnaanngilaat. Amerlanerusunilli aningaasaqarnissamik piumasaqaateqarneq ingerlatseqatigiiffiup pilersinneqarnerani amerlanerusunik aningaasaliinissamut sunniuteqarsinnaavoq. Aningaasaqarnermut piumasaqaatip qasukarneqarnera ingerlatseqatigiiffiit nutaat pilersinneqarnissaannut aporfiusinnaasut ikilisarneqarnissaannik kissaateqarnerup ingerlatseqatigiiffiullu akiitsoqarfiisa eqqarsaatigineqarnissaat taamaattumik imminnut oqimaaqatigiittuunissaannik imaqarpoq.

Taamaammat aningaasaqarnissamik piumasaqaatip qasunneqarnerani suliffeqarfiit imaluunniit suliffissaqartitsinerit aalajangersimasumik amerlassusilinnik amerleriaateqarnissaannik kinguneqassanersoq nalilersussallugu Naalakkersuisut tunngavissaqanngillat.

8. Naalakkersuisut paasisutissiissutigisinnaavaat, Kalaallit Nunaanni aningaasaatit minnerpaamik piumasaqaataasa Danmarkimi atuuttunut naapertuuttunngorlugit appartinneqarnissaat inatsisilerinikkut imaluunniit allaffissornikkut akornutissaqarnersoq, aammalu akornutit taamaattut suunersut nassuiarneqassasut qinnutigineqarput.

Naalakkersuisut ilisimatitsissutigisinnaavaat, Kalaallit Nunaanni Danmarkimisuulli qassinik aningaasaateqarnissamik piumasaqaatip inatsisitigut akornutissartaqannginnera.

Suliassaqarfilli naalagaaffeqatigiinnerup iluaniinnera peqqutigalugu ingerlatseqatigiiffiit pillugit inatsisip atuuttup allanngortinneqarsinnaanera attuumassuteqartut inatsisiliornermi suleriaasaat aqqutigalugit allannguuteqartitsinissaq piumasaqaatitaqassaaq.

9. Naalakkersuisut paasissutissiissutigisinnaavaat, ukiuni 2015-imiit 2025-imut Kalaallit Nunaanni ukiumut ApS-it qassit nalunaarsorneqarsimanersut, kiisalu aningaasaatit minnerpaamik piumasaqaataat naammassineqannginnerat pissutigalugu nalunaarsorneqanngitsoorsimasut imaluunniit itigartitsissutigineqarsimasut pillugit paasissutissat pigineqarpata taakku saqqummiunneqarsinnaanersut?

Naalakkersuisut ilisimatitsissutigisinnaavaat, ingerlatseqatigiiffiit nalunaarsorneqarneri Erhvervsstyrelsenimit aqunneqartarneri. Taamaattumik Naalakkersuisut qinnutigaat, Kalaallit Nunaanni piffissami 2015-imit 2025-mut piginneqataassuseqarluni ingerlatseqatigiiffiit (ApS-it) qassit ukiumoortumik nalunaarsorneqarsimanersut pillugit Erhvervsstyrelsen ilisimatitsissuteqassasoq. Erhvervsstyrelsen ima ilisimatitsissuteqarpoq:

Ukioq	Piginneqataassuteqarluni ingerlatseqatigiiffiit pilersinneqartut
2015	43
2016	43
2017	54
2018	61
2019	84
2020	83
2021	92
2022	99
2023	65
2024	85
2025	101

Erhvervsstyrelsen aamma ilisimatitsivoq, aningaasaateqarnissamik piumasaqaammik naammassinninngitsuineq pissutigalugu qassit iluatsinngitsoorsimasut imaluunniit itigartinneqarsimasut paasissutissiissutigissallugit periarfissaqartoqarsimanngitsoq.

Tamatumunnga siullertut pissutaavoq, 2018-ip sioqqullugu aaqqissuussami Erhvervsstyrelsenimit iserfigineqarsinnaanngitsumik sullissisoqartarsimanera.

Aappaatut pissutaavoq, 1. januar 2018 aallarnerfigalugu Kalaallit Nunaanni inatsit naapertorlugit ingerlatsiviit virk.dk-mi digitalimik nalunaarsorneqarnissaat pinngitsoorani atuuttussaaitaaleramat. Digitalimik nalunaarsuineramik aaqqissuussaq ingerlaannartumik nakkutilliinermut tunngasunik arlalinnik

imaqarpoq. Nakkutilliinikkut ilaatigut ingerlatseqatigiiffiup pilersinneqarnerani aningaasaateqarnissamik piumasagaatip naammassineqarsimanera qulakkeerneqartarpoq. Taassuma saniatigut nakkutilliisut taakkunannga uppersaasinnaasimapput. Ingerlatseqatigiiffiit aningaasaliiffiusut nalunaarsorneqarnerini paasissutissat uppersaatillu pisariaqartut pigineqartinnagit taamaalilluni nalunaarsuisoqarsinnaasimanngilaq.

Inussiarnersumik inuulluaqqusillunga

Med venlig hilsen



Mute B. Egede

Nunanut Allanut, Inuussutissarsiornermut Aatsitassanullu Naalakkersuisoq